

salicis, ulmi, harundinis succo, cummi, resina. His primis aluum ipsam intus <in> totum ut quodam tectorio inlinunt et aliis amarioribus succis contra aliarum bestio-
larum audivitates, id se facturas consciae quod concupisci possit; isdem fores quoque latiores circumstruunt.

VI (7). Prima fundamenta commosin uocant periti, secunda pissoceron, tertia propolin, inter coria cerasque, magni ad medicamina usus. Commosis crusta est prima, saporis amari. Pissoceros super eam uenit, picantium modo, ceu dilutior cera. E uitium populorumque mitiore cummi propolis, crassioris iam materiae additis floribus, nondum tamen cera, sed fauorum stabilimentum, qua omnes frigoris aut iniuriae aditus obstruuntur, odore et ipsa etiam nunc graui, ut qua plerique pro galbano utantur.

VII. Praeter haec conuehitur erithace, quam aliqui sandaracam, alii cerinthum uocant. Hic erit apium dum operantur cibus, qui saepe inuenitur in fauorum inanitibus sepositus, et ipse amari saporis. Gignitur autem rore uerno et arborum succo cummi modo, capit Africi minor, Austri flatu nigrior, aquilonibus melior et rubens, plurimus in Graecis nucibus. Menecrates florem esse dicit, sed nemo praeter eum.